

四庫全書

集部

欽定四庫全書

棋埜集卷六

宋 徐元杰 撰

狀

轉對狀

恭惟皇帝陛下貴爲天子心與天通動一念慮之微有
善不善休咎之徵卽緣而起常若與天靈密相周旋况
顯而視聽言動之敬肆其有不關於慘舒之徵者乎邇
者亢陽爲沴陛下齋心屢禱有感必通臣每侍清光陛

下不以臣愚必垂閔雨之間臣之所奏嘗及於天之所助者順欲陛下驗之五事之間玉音曰俞曾無難色此宗社生靈之福也臣聞天理與人事同一脉絡五事與庶徵相爲影響視聽言貌皆主於思而思必無邪則事皆敬敬與不敬休咎關焉然則人主欲回咎徵而爲休徵勿求之於天求之於已而已矣昔禹湯之有天命皆原於罪已之一念鯀湮洪水禹乃嗣興叙九疇而先五行必次以五事之敬用殷邦旱暵湯閔弗雨懼不敬

以傷民命惟急於六事之自責夫六事之叢其責意者
五事之虧其敬與臣請先以五事明之禹之意若曰人
主之耳目不可以偏寄也故敬心常運於視聽之間不
使媒近得以爲吾聰明之惑庶乎喜怒中節氣步以是
而準寒燠其有不時者哉人主之辭色至易以窺伺也
惟敬心常攝乎貌言之際不使紛亂得以爲吾肅乂之
撓庶乎形聲俱和燥濕以類而應雨暘其有不時者哉
不然狂僭豫急之弗察反休徵而爲咎徵一息間耳此

禹所以隨用而持敬與成湯克享天心之主也天之不雨何至此極六事之失亂世之常也湯平政而愛民不邇聲色不殖貨利而又不吝於改過亦何至民政之失節讒夫之敢欺與夫苞苴女謁宮室之動其欲豈一有是當責之事哉湯則不敢以自信也惟其自信之不敢故其自責之甚深自責之念深則自欺之意泯天高聽卑宜爲之動桑林之雨湯之真敬驗矣且禹湯聖德之君也自後世言之亦何以罪已爲哉然則人主非知有

克己之學不足以進此今陛下天資冲粹聖學高明居
皇極五位之中而體洪範五事之敬遇災知懼欲銷去
之責已省愆不爲文具夫是以天心有潛格之應歲事
有中熟之占是烏得不爲今日喜然臣之所喜今日也
臣之所慮亦今日也乃者霄躔多愆陰精輒蝕江潮忽
洶湧矣堤岸仍潰決矣水土之性亦如是而稍失吁天
心之仁愛陛下所以昭示譴告者在是蓋不特雨澤愆
期之一警也況夫比歲以來邊界禍慘吾之國勢屢警

而忽定固不可謂非備禦之力然或者以爲太乙福德
久躔吳分此天所以佑宋也吁天幸其可以常恃哉國
家陽九之會邇在目前靜察天時敬修人事寧深信而
無其驗毋忽視而稔其憂臣懇懇然每勸陛下以敬用
五事者不但爲閔雨發也陛下果有所警悟當深求克
己之仁特發罪己之勇循大禹敬用之實如成湯自責
之忱視聽之達於下者必公貌言之出於上者必謹民
政之利病必察宮室之增崇必戒以至塞貢獻之路杜

邪枉之門使苞苴女謁之計不行而讒諂面諛之人不可進矣如此則聖心之主宰者愈定聖德之發彊者愈充天數之靡常者必回人事之可恃者必驗聖宋宗社億萬年靈長之休只在聖心真積力久之敬而已不然五事之敬用或不能以持久則皇極之建用將恐流而爲六極之弱何以銷未形之患哉臣憂治危明冒言及此惟陛下矜赦而嘉納焉不勝惓惓

應詔薦士狀

恭准聖旨指揮自侍從至郎官各薦舉誠實敏明堪充
內外職事官者臣猥以疎庸綴陳邇列寂無報稱常切
凌兢每惟內外之修攘莫重賢能之任使朝思夕念所
以懇懇切切告之廟朝初不敢厭其數凡舉世公論所
推予之彥亦既莫不屢瀆天聽矣惟是才業之著於州
縣者未悉以上聞氣節之著於卑官者又限於資格今
即臣平日察知之深如京官如選人各以五員爲明時
薦臣謹第其人品細書其銜位姓名作四項條奏如左

一臣伏見承議郎新通判邵武軍陳義和奮由學校見
位典刑頃分教泉南部使者陳韡欲以京削上義和辭
曰愚年踰五十矣他人誰肯相繼薦舉謝不受諸司聞
而異之不旬月而舉剡溢格作邑晉江廉靖公恕士民
歌之及倅鐔津嘗攝郡事一日必葺救荒有政殆不減
青州所活民命之數堂有垂白之母家事率稟命而行
母子俱賢道途翕稱之臣與爲代方敬其人之孝廉且
剛介而不屈於權勢每事必就問之不謂當路風聞之

訛遽使之去臣爲之泣別焉今猶待邵武平分之次士
論稱鬱久矣宣教郎前知信州玉山縣蔡薦積心苦學
抗志前脩初尉建昌已有植立弓兵畏愛警捕忘疲三
載居官境內奠枕其丞衡陽佐理聲績具見於當路之
所稱迨爲八桂糾曹盡心刑獄一郡無冤民薦敷及格
試令玉山勞心諄諄視民猶子一簞不以妄施至於戢
姦鉏暴殊不以彊禦而沮前後舉陞陟舉科目舉旌擢
者率二十餘剡臣亦嘗備數薦之矣宣教郎新擬知福

州古田縣事鄭侶有文藝而充以器識交名勝而傳於
見聞從容詞翰之間有古作者氣象其爲鹽場官也措
置規模吏卒爲竦及兼僉幕剖決如流至今士民稱之
迨居沿海制幕識慮精詳有婉婉畫事之可否見必立
決寧甘犯時之所忌不忍苟徇以病民契舊滿朝恬然
不以希進爲意臣謂此三人才識氣節宜甄錄陞擢可
以備異時風憲之選一臣伏見朝奉郎通判潭州軍州
事趙崇栗才具疏通心事平實臣雖不識其人聞其政

於宰鉛邑之時邑廩場兵八百人前後每困於月支之
不及人戶以預借爲苦經理有道公私通融不煩文移
罔或不給蓋其爲政有本末待士有禮遜謹庠序之教
而興以孝悌凡士習科舉之業崇粟率以旬課考覈焉
士民化之勤脩文行而獄訟日以簡寡今倅長沙凡郡
綱軍政之所係善贊帥長密商畧之帥亦傾心採納其
善是以庶務闕決墜舉曠修邦人歌別駕之功往來士
夫類能言之宣教郎新知臨安府臨安縣王亞夫生長

名門多識往行才學器識卓爾不凡初爲會稽倉官考
柅姦欺盡瘁稱職檄兼幕屬贊畫尤長帥府以部內多
凋敝之邑一一試之攝宰亞夫以撫字之意行於催科
之中所去見思旗幟遮道及爲閩清令莫不舉偏補弊
各適其宜邑多大家不阿不撓良善爲之吐氣且其素
以恬靜自持不挾書不干進當路聞風而爭舉之臣與
之交嘗謂臣曰平心敬物世間事無不可爲者臣以是
尤敬之臣謂二人者才學實切於實用宜拔擢獎任以

備他日都曹之選一臣伏見從事郎監行在省倉上界門趙希慎名父之子宗胄之賢自其爲海鹽簿領時究心銷注曉夕忘疲藹然有廉平之譽當路名賢知其局蘊之宏深乞加旌擢者殆不容口今爲省倉門官尤嚴於吏卒出入往來之禁檢柅欺弊密切究心薦舉及格蓋非有求而得者臣在都曹嘗欲薦之已爲他人所先矣從政郎監行在編估局詹文杓孝行著於家庭賢譽藹於鄉井奮身庠序光價翕騰分教瑞陽文風爲之不

變今爲京局疏導貨滯檢杞吏欺尤能以職業自見臣
與同里知其平實無華雅有志向非矜奇驚外者之比
臣以爲是二人者可以備二令掌故採擇之需一臣伏
見迪功郎特差監行在膽軍激賞庫葉采學有淵源文
有氣骨平居雅有膽畧人多以後來陳韓期之由其婦
翁李方子所得於晦庵朱熹之真傳故能服膺古訓而
勿失今職居筦庫勉竭忘勞捧檄僉畿多所及物時賢
皆以廉勤公介稱之采方志於向上事業暇則手不釋

卷異乎馳逐京塵者多矣迪功郎新建昌軍軍學教授
盧鉞奮身庠序卓然以名節自持方其流俗頽波率先
以天理民彝之不可亂者爲之啓奏忠誠懇惻奮不顧
身而一以國之安危存亡者晝夜慟哭臣與素昧近甫
識之蓋嘉其志敬其人汲汲然薦引之迪功郎新信州
上饒縣主簿湯漢家學相先文價蚤定其所交游者皆
前輩老師宿儒也不惟著述具有法度至於操履亦有
渠儀近世名賢率尊尚之或獎薦之奏名別頭大對天

陞昌言無隱犯時忌而不顧其辭大畧謂上下相習於欺大欺則大得志小欺則小得志蓋箴切當時之膏肓今待次勾稽奉朝命主象山書院相與諸生日由乎博文約禮之地是雖未及乎民而所以及於士者亦不貲矣臣以爲是三人者謂宜度越拘攣或陟之文學掌故或改畀以見次教官豐殖長養以待異時之顯用豈不足以及壯國之精神臣生而愚戇一無他長惟有愛敬賢材不翅饑渴今所薦引劑量久之既已明著其所長亦

可知其績用况朴實廉敏萬口不誣如蒙聖慈擢用後
或不如所薦臣甘重坐繆舉之罰貼黃臣竊惟自昔天
下之事非人才不能以有濟今問之在朝則耆舊凋零
問之在野則遺逸散漫於此而有作成興起之念焉則
何材而不資世臣聞之師曰人主愛惜人才必於卑微
寒畯之時而豐殖培養儲為超躡登用之地故遴選之
必極其精委用之必當其任師儒教導之官不容以輕
畀職幕刑獄之吏切戒於輕予外而監司郡守必謹簡

其賢內而職事散官必更迭而出上而卿監郎曹又上而侍從臺諫給舍凡自內及外見任之與閒退者莫不具姓名而籍記之其在內則三省而下咸責以考察之公其在外則監司郡守迭嚴其舉刺之法所薦惟賢則必賞所舉或繆則必罰材或足以集事雖譎詐可以御而使功或足以掩過雖愆尤可以宥而錄繼自今欲乞陛下明詔大臣取內外小大之臣分置簿籍盡紀姓名開具功過其爲籍也隨職任之小大爲編排之次第每

每各以一本而置之銓部留之省府上之禁嚴庶乎按圖考索如指諸掌若是則緩急可以搜尋出入可以更迭而無臨事乏材之嘆此特在一作新之頃而已詩曰周王壽考遐不作人所以見豐芑數世之仁也惟陛下矜采愚慮而亟圖之貼黃臣又聞人材難得自昔之通患人心不正今日之隱憂莫深焉夫士大夫不可以負知己固也自他人對知己而言則重在於知己自知已對君父而言則君尊如天無二上也他何敢知臣嘗怪

夫舉主之薦人則終身有門生之稱士夫甘求汲引其
未薦之始已諛之以恩門矣以公舉而爲私謝以朝廷
之公法而便予者求者之私欲士風既壞習俗已成雖
有識之士勉強而從俗焉臣前日講次讀國朝通略而
陛下與臣嘉嘆藝祖皇帝之遠慮如詔進士不得呼知
舉官爲師門恩門并自稱曰門生此正人心之要術也
今日士大夫知有私恩而鮮知有君父陛下既奮然作
新之矣臣於此欲乞陛下明詔大臣取藝祖之所以戒

進士者戒今日之士大夫請自來歲元日爲始凡下而
舉主之薦進上而大臣之擬除皆當使士大夫知有國
法知有君恩不許仍襲恩門恩家恩座恩公之稱併於
門生二字亦合禁止內則令臺諫給舍覺察之外則使
監司郡守稽劾之如此則人心正而風俗定其於世道
非小補云

兼中書辭免奏狀

楓陛晨趨方玷起居之注薇垣日直又膺封駁之司驚

擢筆之自天凜措躬之無地伏念臣學非知體材不逮
心幸遭世之休明過僥榮之殊特人微品陋陪虎觀之
說書恩重報輕濫螭坳之載筆重之以史官之屬愧乏
三長增之以省闈之員慚無一得每竊憂其尸位嘗力
籲于公朝以都司劇務之繁知陳力不能者止乞免兼
于茲職或少逭於曠官凜然僂竢於奏陳恍此狎叨於
優渥爰瀝避循牆之悃庶逃負且乘之譏伏望皇帝陞
下回哲鑑之昭融矜愚衷之懇惻察臣以窮五技之劇

亮臣以難數器之兼亟收成命於已盼別選時髦而更
畀俾恬常分少穆師言

再辭免狀

其疎庸末學玩愒班行久誤簡於中宸恍擢兼於外制
凌兢自揣稱塞謂何碩方躡侍于螭坳無以仰裨于鴻
化况陪晚講茂告辰猷既塵省闈之彌綸又濫史官之
採擇疊是清切付之么微豈惟拊膺痛省之非宜抑念
陳力不能而當止嘗殫忱悃屢瀆廟朝乞免廁於都曹

尚稍澄於方寸願竭經帷之啟沃勉裨直筆之編摩已
屢控於下誠竟未蒙於上微詎意明綸之渙發又叨御
筆之兼除以薇掖之清華進草茅之愚賤負慚且乘避
極循牆爰敷瀝於微衷乞收還於成命天高聽邈地重
責難敢茲再犯於威顏輒以上干於鈞造仰祈敷奏愿
體忱辭並改畀於名流庶稍恬於愚分陳情懇切俟命
汗皇

兼侍講辭免奏狀

拜手宸奎叨恩稠重陞員早講揣分凌兢竊惟螭坳記
注之司兼以虎觀討論之職皆寵眷儒臣之極實養成
君德之基繩愆糾繆而格其非陳善閉邪而謂之敬能
贊緝熙之益必惟博洽之賢然非其人不在茲選伏念
臣迂踈末學蒙被殊知敷陳第守於遺編玩愒已經於
匝歲由說書而進講見謂僥踰矧兼職之太繁難爲報
稱伏望皇帝陛下曲回淵聽俯循微衷亟改畀於時髦
俾退循於分守

再辭免兼侍講狀

末學無庸蔑稱駢蕃之疊組誤恩非據惟知辭避以循
墻茲愚悃之已陳企俞音之尚闕况螭坳載筆方忝晨
趨而虎觀談經難陪早講荐瀝由衷之懇覬推從欲之
仁伏望公朝特賜敷奏早收還於成命亟改畀於時髦
庶穆師言稍安常分

御筆除起居舍人辭免狀

鵷行疊寵方躡貳于容臺螭陞記言乃遽膺于御寶蒙

恩深厚拊已凌兢伏念其賦性本愚聞道亦晚由郎監而躋奉常之亞甫年歲而慚取數之多旃屢談經曾何啓沃羽衣定舞正乏端凝益叢尸素之愆狎拜恩洪之誤屬聖主方調於政瑟而元功迭轉于化鈞羣賢廣拔于茹茅小善不遺于絲粟遂令窳陋數玷埏鎔茲宜黜而反陞實叨榮而知懼伏望公朝之敷奏許令成命之收還改畀時髦毋忝玉階之侍庶恬愚分姑仍金掌之華

再辭免狀

數取爲多玩愒深慚于匝歲司存有四陞遷更覺于踰
涯以器資宜處于常流而柱史敢當于清選負或譏于
且乘避已劇于循牆况熙朝新化之云初而公道引賢
之及遠顧此僥踰于清切惕然恐懼于滿盈晚講金華
每幸龍顏之近晨趨玉殿敢圖螭陛之登在輿論其謂
何茲忱辭其宜瀝天高聽邈未蒙俞號之矜從地峻人
卑荐瀆化鈞之敷奏終祈得請式荷保存俾常分之稍
恬庶師言之允穆

魚國子祭酒辭免狀

某愚陋晚生玩愒班列叨恩稠重揣分凌兢方以都曹
責任之難勝嘗布公櫝哀鳴而靳免既陳力不能而知
止况爲師患在以奚堪忽蒙聖恩擢兼祭酒此昭代隆
儒之妙選豈不學無術之敢當避辭儻昧於循牆進退
詎勝其維谷輒抒忱款仰恩公朝乞敷奏於上前冀收
還於命寵別畀清望庶允輿言

除太常少卿辭免狀

其爲學空疎綴班玩愒寵榮僥躡疾疢支離胃膈之喘息未寬手足之顛連相繼惟切祠官之請忽兼宰掾之華情漫劇於循牆譏莫逃於負乘驚心蔑稱愧汗謂何詎知一陽來復之辰狎廁衆正偕升之造以奉常之卿亞曰宗伯之秩崇豈徒俎豆之事嘗聞抑亦禮樂之用爲急非賢不畀振古如茲顧愚何人躡塵是選况以沉疴之未瘥尤於責任之難勝苟弗自量輒冒非據恐災危之莫逭抑顛踣之奚堪乞賜敷奏收還成命改畀名

流容某祇服舊僚退恬愚分實拜保全之賜允殫報稱之私

差知安吉州辭免狀

某一介愚庸濫員祕館昨者謁告奉侍屬以久病奔赴莫前痕曠積愆惕懼萬坐公朝涵貸未即誅斥躡遷次撰冒攝西曹聞命震凌病勢愈甚已於十月五日從本州備申乞檢照前後累積特賜敷奏陶鑄祠廟差遣方茲懷懷俟謹忽此二十八日准省劄乃知初四日上沐

誤恩差某知安吉州僥踰稠疊感激涕零靖惟晚生遭
遇清時忝冒非據災咎狎至瀕死屢矣敢圖薦被綸徽
出於夢想所不到向使未罹疾病猶以材疎學淺弗克
勝任爲慰矧今形神憊極心志凋摧畿右藩輔實爲巨
屏決非所以爲么麼養痾之地重念先大父名諱又與
本州上一字同合該回避欲乞再與備申尚書省仍乞
檢照昨來屢陳乞賜敷奏改畀小小祠廩以活衰殘他
日未先朝露誓當糜殞上答君恩

再辭免狀

其窮苦一寒母老累重家無立錫之地啼號煎迫皆願
竊祿少逭凍餒之虞弗謂命乖病拙且久一歲將理僅
延喘息心志荒耗動輒顛連稍臨應酬悸亂斯極自知
甚審勉竭尚艱加以祖諱妨嫌雖拜免避之旨私心終
亦懷懼與其不自揣量貪冒榮寵重取非據之辱孰若
展轉哀籲祈遂初請寧蹈繁瀆之誅欲望備申尚書省
乞賜矜念迫切之極特與敷奏改畀祠廩差遣一次他

日容有生全之望誓當糜殞以盡職分

召赴行在奏事辭免狀

某一介疎愚竊第過分昨以憂患之餘遽叨誤渥濫員
館職愧劇非宜謁告侍親久病瀕死屢控真切之悃上
干公朝擬乞陶鑄祠廟差遣少遂將理待命朝夕曲蒙
涵貸寬其曠弛之誅狎被叨遷予郡之旨拊膺悚惕蔑
稱隆恩驚喜薰心滋甚其疾固嘗游絳州郡備申朝省
乞檢前請未沐俞允凜措躬之無地乃拜命以自天茲

辱州郡緘示四月二十二日省劄特收召於顛連之餘
俾濫次於英賢之後重惟其衰朽屏伏日懼獲戾徼恩
非據公論謂何心愧凌兢涕激感烈所當鞭策駑鈍匍
伏而前然而寵數踰涯灾咎未已上而親痼疾之屢作
下而某宿恙之未瘳合室多屯生意一髮輒瀝危懇仍
乞備申朝省欲望矜惻特與檢會前後累牘回賜敷奏
收還召命改畀小小祠廩以全侍養以活衰殘繼此苟
存餘生誓當糜捐恪盡職分他日應有繁難役使誼不

敢辭所有省劄內稱劄付徐宣教緣某見係承事郎未
拜循轉恩命未敢係銜

再辭免狀

某此月十六日準省劄條示循轉因依及檢會已降名
命不許辭免仰認公朝涵貸甄錄之造退循么麼疊被
殊恩感涕凌兢當疾速就道以待譴命重惟某踈愚未
學叨躡非宜寵溢灾生痼疾屢作加以親老多病晨昏
藥餌將侍尤難牽迫之私交困於此竊惟公朝以忠厚

養士之氣以仁明體人臣之心凡有至情皆獲俯遂今
茲哀籲之瀆不但至再至三雖自速辜實出於勢之不
獲已然亦深念受國大恩未有毫髮補報動息慊懼痛
切忖量以抱疴屏居而誤躡遷予郡之恩以分教日淺
而徵徹章增秩之賞所謂宜罰而賞且濫及當罪而恩
反過施公論謂何措躬無所然而已頒綸告誼不容辭
此月三日甫獲祇領謹已望闕遙謝外惟是某真切之
悃殫瀝如前再乞備中朝省欲望矜憐察某屢瀆之辭

非有他故念其貧病之久實未能支持與敷奏乞賜陶
鑄祠廟差遣或畀待次小壘以便藥奉以活衰殘他日
未填溝壑誓當捐殞以盡愚分所有循轉一官不敢辭
免俟將來實歷或該磨勘乞與比折施行庶或稍追清
議實拜終始生成之賜

丐祠狀

某寒鄉晚出際遇休明躡侍經筵薦歷郎監恩寵太過
夙夜凌兢近因輪對敷陳控乞祠廩進講之次再溫前

請力露真忱天聽蓋高俞音尚闕實念某賦性樸拙為
學空疎無補緝熙已慚尸素況臣憂患頻仍之後志氣
凋落之餘自入秋冬支離多病儻不亟上問鈞之請恐
難自逭伐檀之譏欲望公朝特賜敷奏畀某叢祠歸里
俾得調將宿疾溫習故書實拜大造生全之賜

又

某一介寒晚濫廁班行極思空疎莫贊緝熙之益居慚
樸拙曾何營繕之箴積玩時愒日之愆慊憂國愛君之

報寵非其據福過而災入冬以來感疾甚拙咽囁之痰
涎屢塞心胃之氣喘難支日消渴以為常夜呀呬而妨
寢行步屢踣拜跪良難雖起居飲食無異常人而忪怖
怔忡甚非佳證既薄命苦一身之疾忽親兄貽多故之
書昨因哭妻重以失子老來傷感日劇沉痾既傳報於
喪明又繼聞於病腫知其荼爾一榻之上何以堪此同
胞之情況茲自受病於腹心又爾重稔灾於手足若更
貪榮而尸素恐深獲戾於穹蒼是用殫瀝愚忱籲呼仁

造祈便尋鑿之請稍躬侍藥之勞欲望特賜敷奏陶鑄小小祠廟差遣俾全將理少掄顛連他日儻未填溝壑之中此身無非報朝廷之日誓當糜殞語及涕零

制

與懽授資政殿大學士兼侍讀制

勅廣廈談經常預昕朝之會真庭均佚晉穹月殿之名
異命載申師言允穆具官趙與懽才全而德鉅色豫而
氣和蔚為儒科之英蚤結主知之茂峻華塗之步武肅

禁路之羽儀朕心朕德惟乃知嘉謀嘉猷則入告維城
自近京兆尹之政清衣錦暫還曲阜宅之化洽色斯舉
矣卷而懷之矧今政瑟之當調尤重講筵之胥誨人惟
求舊德與俱新清脩宴神館之游別職重名臣之寵春
秋一統之大義嘆美形容君臣千載之賡歌都俞吁咈
味卿言而說繹繫世道之轉旋噫優秩所以尊賢既特
異深嚴之選養望所以儲用何莫非獻納之時可

陳韓授禮部尚書制

勅朕改紀政絃登延從橐狎頒詔旨渴思辰告之猷載
錫恩徽爰陟春卿之長得人甚幸咨衆具孚具官陳韞
出處無心經綸滿腹平居暇日夙韜藏器能政理之長
至公血誠有指授將率方畧之舊惟是進艱而退易足
知內重而外輕方圖濟於時艱亟予環於禁近以儒者
知兵之故晉夏官司馬之聯茲盻盻而望之何遲遲其
來也以禮為羅而天地與並命汝秩宗而夙夜惟寅班
朝治軍非此不嚴安上治民惟此莫善信非賢則不乂

實待人而後行噫有德進則朝廷尊當坐使淮南之謀
寢昔者疾而今日愈其亟膺宣室之席前可

劉應起授監察御史制

勅臺諫寄朕耳目自昔居是選者語及乘輿則天子改
容事闕廊廟則宰相待罪必若是而後無媿於風憲之
任今茲作新大化遠佞登賢將以開世道之泰而猶凜
凜乎君子小人消長之際泰之六四曰翩翩不富以其
鄰不戒以孚誠察乎此則當為微漸慮而所以重風憲

之權宜如何爾應起端勁之節出於天資忠言嘉謀簡
在朕心久矣由今視昔凡所謂佞幸畏宰相宰相畏臺
諫此誠泰交之機語不云乎君子言之必可行也通國
識與不識皆以風憲為爾望今爾益厲志節明乎藜藿
不採之喻以尊嚴乎本朝勉副朕親擢之意毋忽可

王伯大授吏部侍郎兼侍讀制

勅判流內選丞領溫綽之真除為王者師莫重細氎之
坐讀得人甚幸咨衆具孚具官王伯大負抱器能駁歷

中外抗特立獨行之節高難進易退之風家食閩山每
切長卿之門下詔還禁路不覺賈誼之席前上焉惟明
政理之宜下則欲飭銓曹之弊資格固當守尚持激厲
之微權誦說豈徒云願究經綸之大本有謀則告惟爾
之能

余清夫授直秘閣制

勅西崑崙羣玉府之職非其人不輕畀若親且賢有心
吏隱不畀之得乎爾清夫親際休明蚤承恩渥又擢之

於儒術之科廼賸東嘉增員涉筆華以奎閣職與人俱清矣平分風月克邁前脩副朕簡知其無忽可

李性傳授端明殿學士簽書樞密院事兼叅知政事制

勅尚書代喉舌夙簡在於帝心執政猶股肱爰亟躋於宥府兼貳台衡之秩併隆書殿之名渙號甫頒師言允穆具官李性傳靖共而正直博厚而疏通世術斯文祖父兄之並美家傳良史才學識之三長為今儒雅之宗

有古典刑之懿蚤膺簡注偏陟高華從容乎記注之司
溫潤乎緝熙之益澄不清而撓不濁用則行而舍則藏
嘗自詭於一麾已孚惠於千里還甘泉之故步陟司馬
之穹班緬懷去國之餘每甚見賢之渴茲默調於政瑟
喜來盍於朋簪惟時科瑣之事殷載念樞機之寄重夙
夜基命宥密咨爾相維朝夕執事溫恭期予於治俾進
陪於政路仍申錫於圭腴噫折千里遐衝當使寒邊人
之心胆建萬世長策尤資大王室之勲勞式克欽承往

求攸濟可

趙以夫授刑部侍郎制

勅秋官貳職方持憲邦之平宸劄真除式表宗賢之重
得人甚幸咨衆具孚具官趙以夫夙負時名浸敷華貫
考言詢事經德不回入從出藩見幾而作久渴金鑾之
論事茲嚴宣室之召還既忠款之具陳宜司存之蚤正
五刑惟明克允尚持哀矜勿喜之心一歲決獄幾何勉
副輕重適中之託期於予治時乃之休可

劉應起授秘書省著作郎兼侍佐郎官制

勅承明金馬著作之庭非峭直有才者不居况南宮眉
目選士司命亦惟執直筆者兼之爾應起志節姱修精
忠高抗靜退自樂殫見洽聞雅有流品清濁之鑒珥筆
史館列屬銓曹國人皆曰賢往哉汝諧嗣有褒渥可

趙希桴授度支郎官劉克遜授工部郎官制

勅具官趙希桴等上應列宿所與共天位治天職也不
作郡不為郎有祖宗之舊典在焉然非有治理効朕豈

輕畀哉爾希杼英蜚宗冑蔚有吏能今農扈方以匱聞
其為我領司庾之曹爾克遜名閥奇才榮塗休聞時方
總名實而課功能其為我程度材之事參華列宿用以
疇庸各欽乃司共聽朕毖可

宗嬭授大宗正丞兼刑部郎官制

勅我家本支百世莫重於掌宗藩任重置丞以參領之
郎潛兼攝增責司存其選蓋不輕也爾宗嬭以公族之
彥蔚為文學法理之能贊猷棘庭藹有令聞簡畀作牧

眷眷留行俾涉筆瑤籍之編含香秋官之屬靜專溫敏
咸稱厥官往哉汝諧嗣有褒渥可

業秀發等授考功屯田郎官制

勅具官業秀發等郎官上應列宿而有吏制兵屯之責
焉非治郡有聲者不在茲選爾秀發老於世故蔚有吏
能茲庸列屬天官俾司功過爾與杰卓乎宗賢藹然政
最茲庸分曹司馬參究耕屯惟二臣其各悉乃心隸乃
事芬鬯乎含香握蘭之地咸以職舉則予汝嘉可

徐鹿卿授右司制

勅都司天下之劇曹非明敏練達之士不輕畀爾鹿卿
抱負偉特才識疏通麾節賢勞羽儀班著孚於衆望久
矣見幾而作養高裕如朕既曲成爾志今改絃易聽盍
歸乎來宰旅舊瞻日參廟論豈特吏刑戶版疏條其事
而已尚服厥職勉贊經綸欽哉其無斁可

謝方叔授左司諫制

勅昔慶厯中御筆三諫之除蔡襄作歌有風采動朝端

之言朕甚嘉之今政瑟再調言官妙選斷斷親擢實以
寄朕耳目下則糾正官邪上則規正吾闕蓋必有見遠
識微開悟警飭護世道於常泰其選豈輕乎哉爾方叔
西蜀英特之望昔在烏府直聲聳中外諛佞為之奪氣
茲還卿列積誠敷奏致察乎陰陽消長之機預為泰道
復隍之慮則卿於君子小人之際計之熟矣擢居諫省
俾陳善閉邪納誨以輔台德邦其永保於泰則予一人
以懌欽哉可

謝方叔授太常少卿制

勅奉常命典禮樂近制惟設亞卿況史氏無專職久矣
官不必備惟其人侍從論思此其選也爾方叔望重羽
儀忠存骨鯁急流高湧靜閱典章遂陞秩宗之貳兼提
直筆見謂得人往欽乃司嗣有褒渥可

江萬里授駕部郎官制

勅聖人告顏淵以四代禮樂而取商輅焉矧官以司興
名不明王制不可也爾萬里文藝著於發身孝友施于

有政人不知而不愠朕知之今季秋將有事於明堂起
家為郎姑循平進尚參車制有輓輓以喻其信往復厥
職嗣有寵褒可

江萬里授監察御史制


勅臺諫寄朕耳目不親擢則耳目為他人私今既懲宿
弊而新之祛奸逐邪惟骨鯁之士是卑所以壽世道元
氣於是乎在爾萬里經明行修出長入治峻陟旃厦密
鑒忠嘉懇懇為世道反覆元祐紹聖之勸戒而必純一

於君子道長之望其於理亂存亡之機入朕心深矣擢
寘烏府風采朝端萬萬不為厚確輩開路繼今益勵剛
特不避權倖罔俾唐介專美先朝邦其純一於泰勉副
朕親擢之意欽哉可

江萬里授尚書右郎官兼侍講制

勅朕惟廣廈之下細氈之上豈徒以郎錦進蓋取夫忠
純懇惻言足以華國者居之爾萬里璧海文英敷歷中
外雅有時譽光價誰其疵之然玉以石攻是以成瑞世

之寶予環星列備挹嘉謨擢陞天曹峻陪昕講其務故
沃以副右銓益宏茲賁嗣有顯渥可



欽定四庫全書

集部

樸菴集卷七

詳校官起居注主事臣顧宗泰

主事臣呂雲棟覆勘

膳錄貢生臣苗序瀛

欽定四庫全書

棋枰集卷七

宋 徐元杰 撰

制

王燭授祕書丞葉夢鼎授祕書郎制

勅具官王燭等中祕丞郎職近日月峻武三台之上養
清望也爾燭鏡湖佳氣賢業藹聞爾夢鼎壁海魁英粹
韻絕俗時維二士志節矯修超擢序遷兩協僉徯徃欽
厥職嗣有寵褒可

王佖王煥授太府寺丞制

勅具官王佖等天下錢穀一歲所入幾何不必問之近臣而問之外府受藏之所然非謹簡乃僚則不足以通融出納經費有時而匱矣爾佖名門之秀見謂疏通治郡有聲實焉爾煥儒科之英克自植立班朝有氣節焉各據所長參華司府往欽乃職諒不負丞可

莊黻授宗正寺丞汝暨授司農寺丞汝績授太府寺丞制

勅具官莊黻等職事官華要之武也職丞卿寺者尤簡
時望而任之況於紀麟族參農扈與夫贊邦計出納之
司非其人豈輕畀哉爾黻為今儒雅有古典刑爾汝暨
蘊藉材猷靖共職業爾汝績清通出類英茂軼羣一朝
而得三俊焉尚其涉筆殫勞以蕃王室而制國用各欽
乃職諒不負丞可

希袞授南外知宗制

勅我家本支繁衍分處於外擇宗賢以任糾正所以崇

內睦之仁也爾希袞天派不羣文華甚蔚更迭內外藹
有休稱溫陵在天一方聚族而處者衆矣徃司訓齊卿
克稱此尚服厥職嗣有褒嘉欽哉

時煥授太常寺簿制

勅容臺簿領之職所以稽核禮文之疎闕也非其人豈
輕畀哉爾時煥英蜚屬籍蔚有時名亦既繇故府而陞
帝社周旋乎俎豆之間矣懋簡聲實晉陟勾稽徃欽乃
司典聽朕必可

韓補授宗正寺簿與弼授司農寺簿制

勅具官韓補等國朝序宗派別親疏凡修纂圖籍其別有五所掌必惟其人農扈重事也倉厨委積之政令所以會計出納其責尤不輕爾補魏第清修淑問芬鬯亦既主書九穀矣亟進之以覈譜牒焉爾與弼樂善不羣居官可紀亦既貳左馮之最矣茲陟班列而旌爾能各徃鈎稽尚悉乃力勉稱朕意嗣有寵榮可

黃炳授祕書省校書郎制

勅唐人閱元齡於讎書之日蓋已知其為國器矣則是
選輕畀得乎爾炳蚤擅文場蔚有時望頃繇宣對剴切
當心足以覘韜養之素鈇黃點勘既悉爾長典教茲陞
華哉冊府往欽厥職祇服寵榮可

范鎔授集英殿修撰制

勅國朝殿閣九等之制莫穹乎集英論譔之名所以尊
德獎恬實於是乎在而况齒之宿意之新方勇於掛冠
神武不以是畀之得乎爾鎔儒學發身堅苦刻厲昆弟

自為師友故所至有惠政嘉績表著山立蔚乎羽儀雅
志清高方燕琳館忽引疾以謝事覽章殊不憚陞班書
殿勉循懇祈可

范鎔授祕閣修撰依舊宮觀制

勅殊庭均佚所以礪廉隅內閣美名所以寵耆碩爾鎔
以粹學清修之彥著出長入治之聲甫茲華武之浸穹
顧以叢祠而自適朕方崇難進之節卿宜膺寵勸之恩
爰陞中祕論譔之華以遂雅志高閒之趣可

卷七
陳振孫授國子司業制

勅辟雍海流道德之富師儒左右責任惟均蓋必極天下之選斯可副天下之望爾振孫研精經術有古典刑敷歷滋深靖退自若予環郎省位未稱德朕心慨焉陟樂正以貳司成僉論茲允尚祇厥職罔俾陽城韓愈專美有唐維時欽哉以稱朕意可

葉夢得授宗學博士制

勅公族國之枝幹也教訓之官不備則不足以玉其人

爾夢得宿學典刑見稱儒雅賢勞州縣簡拔登朝亦既
勾稽奉常禮文之闕矣由是而衣博士衣其為我啓迪
宗藩納之信厚如麟趾之時焉往欽厥官對揚光寵可
徐士龍授國子博士王璞授太學博士制

勅具官徐士龍等唐韓愈以六經之文倡其為博士也
招諸生誨之曰業精於勤行成于思必以荒嬉毀隨為
戒當時學者仰之如泰山北斗宜矣爾士龍蚤有文名
今寘經幄其為我明教胄之典爾璞才宜躡用制有攸

拘其為澄養士之原庶幾蒸蒸髦士業精行成罔俾韓
愈專美於有唐徃欽乃司典聽朕必可

希樸授江淮等路都大提點制

勅朕闡坤珍以致天下之利資能臣以持九路之節其
責任亦甚重矣爾希樸最溢扶風擢陞列宿邦計登耗
惟其周知亦既司金就煩問鑄俾山澤之政以舉化泉
於是乎通融徃欽乃司嗣有褒寵可

趙葵授同知制

勅求忠臣於孝子之門幸恪終於舊制起威望於兵機之地宜坐折於遐衝併疏侯爵之封仍衍圭畚之實載頒渙號允穆師言具官趙葵樸茂而疏通恢弘而果毅挺挺乎山西之將種彰彰乎邊徼之威名入踐班行蚤歷侍從論思之選出分閫牧潛消寇賊姦宄之萌彼遠何知謂秦無人卿世其家為魯有後凡所上方畧皆古名將之用心不苟讀父書惟前聞人之濟美既奏蕃宣之績迄躋宥密之聯方從容資善勝之謀乃慷慨奮急流

之勇以親恩為當報盡追禮以弗渝謂子道苟克全庶
事君之無闕凜然風節足以儀刑況當萬化之作興莫
重四郊之備禦凡今邇列來衆士以慰四方之心視昔
副樞得一賢以制千里之難卿不失其舊物朕將勵於
親功內焉領執政之股肱外以寒敵人之心膽噫若瞻
之拜元祐豈徒贊一人之休如鼎之翊紹興益以壯三
邊之勢可

顏頤仲授祕閣修撰知温州制

勅中祕論譔之華必於內外敷歷資望深崇然後畀之
所以重良吏也爾願伸出長入治藹然休稱粵昔神臯
轉輸彈壓厥勛茂焉洵以班穹駸駸豹尾不見是而無
悶靜閱世故滋熟矣寤興簡注爰陟隆名徃殿藩方式
孚來暮則予爾嘉可

王克謙授知安吉州制

勅茗雲古名郡今之右扶風也選用良吏豈輕乎哉爾
克謙親際明時榮膺殊渥敷歷中外朝望浸穹簡用於

金匱要略卷之七
均佚之餘輟征舶而試關輔河潤九里福及京師廉恕
公勤徃宣德意其毋忽可

趙必願授煥章閣學士知福州福建路安撫制
勅統閩區而授鉞允資八座之賢峻媯閣以錫名增重
十連之寄起家有命咨衆無譁具官趙必願宗國騰英
相門濟美多識於前言徃行所至有惠政休聲臺閣典
章之司皆其練習廟朝訏謨之地賴以彌綸徧歷乎法
從論思之班周知乎戶版生齒之數不以簿書期會為

黃自然授直秘閣廣西運判制

勅桂海距天遼邈一道部使者之寄甚重匪輕簡拔循良之望陟隆名以寵其行蓋知遣使臣以禮樂言遠有

光華者如此爾自然器姿宏拓志節矯脩治郡既以殊
最聞征舶提綱非所以處鄉者易節而南晉之奎職非
但欲卿廣漕運而已凡吏治之能否士風之美惡民生
之休戚皆惟觀采風謠而施政與教焉績用茲成不次
圖任欽哉其無斁可

黎安朝授兩浙轉運判官制

勅朕惟畿甸將指每嘆才難兩道運輸責亦重矣歲當
大禮應辦良勞遴選惟人於是乎有隆名以華之爾安

朝駁歷滋深清通有立郎星卿月浸陟穹班通漕神臯
密聯奎閣勉服乃職其副簡知可

李仲熊授湖北轉運判官制

勅荆楚上游國之頭目也所以寬朕顧憂者轉輸之責
莫重焉觀詩遣使臣以禮樂言遠有光華者以此爾仲
熊西蜀儒艾見謂典刑薦歷州麾徧儀郎省亦既參究
乎天理節文而為民彛計遽辭以疾何哉然明分有兼
足之理尚持此樽節調度往將使指足食足兵祇若予

采欽哉可

趙立夫磨勘轉官制

勅祠庭均佚已穹次對之班邦典陟明式應序遷之秩
誕敷渙號允穆師言具官趙立夫博厚疏通靖共正直
為善最樂粹然公族之賢大雅不羣卓爾時髦之譽久
踐敷於中外深簡記於材猷京兆政清何止十萬戶之
福急流勇退又推二千石之良雙溪八詠之賦歸高卧
久閒而自適三載尚仍於考績一階何靳於疏恩噫積

日課功勿謂年勞之當得惟人圖任尚堅晚節以需榮
可

王伯大磨勘轉官制

勅貳天官而帥屬方借重於經筵參歲考以陟明茲式
循於邦典誕敷渙號允穆師言具官王伯大抱負經綸
光明出處予懷求舊正法從之真除飭弊更新喜銓衡之
平允密切雞翹之眷倚從容旃廈之緝熙以朝夕論思
之常參稽政理庶日月將就之益興起治功姑繇積累

當進之階詎廢勘磨有常之典加貢師儒之妙選併仍
爵邑之故封噫增秩所以優賢朕既懋褒崇之渥重祿
所以勸士爾其殫啓沃之忠可

李性傳磨勘轉官制

勅法從彌穹懋眷養高之節恩徽載錫併疏增秩之榮
雖循考第之彛實重班行之望具官李性傳器資宏裕
風範端凝家傳古良史之稱世濟前聞人之美自膺妙
簡徧躡清班虎觀螭坳夙藉記注講明之力鷄翹豹尾

密殫論思獻納之忠矧去國者數暮將待卿以殊用肆
陟春官之長兼陞夕瑱之華師儒之道由是而尊筆削
之公傳之而信總銓衡而率屬激流品以揚清茲由積
累當進之階不廢磨勘有常之典一條冰瑩既丕竦於
觀瞻三接畫勤尚益煩於啓沃可

賈似道收換湖會轉官制

勅通變盡利以神允藉濟時之畧有功見知則悅併旌
率屬之能爰陟華階以彰殊效具官賈似道器資拔俗

機警過人以科第而發家學之傳以才具而勝事任之
重如晉杜預之制課調揀邊有利國者存如唐劉晏之
佐軍興理財在養民而已外以給於饋餉內以固於本
根散而制羣物之低昂歛則操贏貲而貿易况楮幣至
此窮矣而湖廣豈曰易然嘗嗟收換非一手之功茲乃
督促盡當時之選獨提綱而妙運果結局以上聞顧乃
舍已而推遜僚佐之長直欲感人而激勸後來之用宜
先爾長各表其勲噫增秩疇庸曾靡靳褒崇之渥既稟

稱事尚益殫經理之勤可

張貴洪表應老恩賞轉官制

勅具官張貴洪等自古奏康沂之功者必推州司馬是
賴矧邊徼多虞而能以備禦策勛朕何靳焉爾貴洪吏
能藹著應辦良勞爾應老夙有智謀密贊商確皆能盡
瘁於攘却之際豈特賢於佐郡而已哉錫之一階以旌
顯效尚叶乃力嗣有寵褒可

希聖磨勘轉官制

勅侍從論思夙簡宗賢之望年勞遷轉允為邦典之常
爰進一階以華疊組具官趙希聖公忠對越知慮精詳
舉能其官隨事無不稱之職見幾而作維昔有難進之
風籍甚民庸偉然朝績肆承旨導揚之際若橫經勸講
之時每論奏則言人所難斯謀猷曰惟我之德獨立不
懼衆譽翕歸茲會課之有彞豈陟明之可後庸加美秩
以增禁路之光益展宏謨其副虛懷之眷可

李大同磨勘轉官制

勅禮隆均秩久懷法從之清閒制重陟明式應年勞之
循轉茲惟常數允穆師言具官李大同鍾秀東陽擢魁
南廡親際休明之代躡登華要之班銓部勞賢執法惟
允文昌去國養高甚恬茲繇積累當進之階不廢磨勘
有常之典時惟增秩既誕告於昕庭爾尚祝釐其並堅
於晚節可

希徵授太社令制

勅祀者國之重事二令周旋乎俎豆之間所以養朝望

而階時用者也爾希微宗英粹質家學賢稱婉畫天畿
樂於為善擢陞帝社俾習聞禮樂之事將以蕃我王室
尚敬厥職祇服寵榮可

留張遇授太社令制

勅祀者國之重事二令所以周旋乎俎豆之間非習知
禮文者不輕畀爾張遇奮由科級早有時名亦既儲望
故邸矣肆旌爾勞擢司帝社欽哉厥職尚副簡知可

李大同大禮追贈父制

勅五室九筵既肇稱於裡禮羣工百辟宜溥勸於孝思
爰以子榮追其父顯具官李大同父鄉評雅望儒學前
修蚤教義方夙厚一家之培植晚收魁第躡登八座之
焜煌肆予大享於先王俾爾均介於景福焄蒿如在宜
誕陟於華階幽壤有知尚益歆於時命可

游侶曾祖藝已贈太保可特贈太傅制

勅曾規詔後懋垂奕世之芳令典追榮爰陟三公之次
睠予哲輔秉國元樞登庸姑畀於舊疆追錫載華於冥

壤具官游侶曾祖藝儒珍光價學海淵源蚤賁志以仙
游有傳家之慶在過庭聞詩禮芳華發再世之餘執政
猶股肱焜耀啓前聞之閎茂揚愍冊密亞師聯茲益責
於幽宮尚時歆於徽秩可

游侶曾祖母蔡氏衛國夫人可特贈鄧國夫人
制

勅積行累功益衍曾孫之慶典機贊化晉加上國之封
渙我明綸光於幽窳具官游侶曾祖母蔡氏閨儀可則

婦道弗違宜爾室家備著肅難之德貽厥孫子篤生輔
佐之賢久焉間兩社之勛勞於以責百年之泉壤人惟
求舊茲煩載領於元樞渥與俱新不靳追榮之令典厥
有光矣尚其歆哉可

游侶祖格已贈太師可追封申國公制

勅還鈞樞之舊物世闕增崇疏公袞之新封祖風丕振
式嚴彰往敢後疏榮具官游侶祖格學力根中賢勞藹
外誼不受辟獨高難進之風志在達權何有干時之惑

忠孝一門之世美子孫累葉之儒科雖不大顯於其身
于以克昌於厥後本兵載託嘉所積之貽謀幽壤有知
尚永歆於褒典可

游侶祖母邠國夫人李氏贈徐國夫人制

勅圖任舊人載陟鈞樞之寄予有大賚並追祖妣之榮
爵祇其夫今煥乎昔具官游侶祖母李氏毓慈西隴配
德南充閨儀冰玉之清婦職藻蘋之潔與君子以偕老
孰不謂宜遽朝露之溘先殆弗可曉幸慶綿於再世復

榮領於元樞追耀前聞併華內助乃畀古徐之望國以
昭幽壤之潛輝尚其時歆服此褒卹可

游侶祖母潭國夫人杜氏特贈楊國夫人制

勅圖任舊人載陟鈞樞之寄予有大賚並追祖妣之榮
爵祇其夫今華於昔具官游侶祖母杜氏毓慈勲胄配
德儒英由奢入儉以宜家中歲蚤孀而秉志蘋蘩婦職
殫勞孝道之躬玉雪閨儀刻苦義方之教露甘來降天
報非誣善積而慶有餘子榮而孫益顯屬方新於大化

爰載典於密機乃加望國之封以侈幽宮之賁庶其不昧尚或知歆可

游侶父仲鴻謚忠節已贈太師追封益國公可

特追封雍國公制

勅名父有子載嚴宥密之登邦典追榮丕衍公主之錫爰躋望國以賁幽宮具官游侶父仲鴻學世其家文根於理論事有激昂之節裋身適進退之宜至公血誠忠具存於王室吾道生氣前無愧於古人位不稱德以何

傷善有餘慶而未艾天佑生於賢佐時妙幹於元樞肆
舉彛章式昭先烈逖瞻南郡嘉節義之如存誕陟西河
尚焄蒿之不昧可

游侶母益國夫人朱氏可特贈雍國夫人制

勅世隆軻訓永懷聖善之劬勞子典漢樞莫重國封之
褒恤感爰孚於陟屺恩允極於漏泉具官游侶故母朱
氏婦道肅雝閨儀端淑蚤著義方之明驗緬懷榮養之
難酬寸草春暉悵母慈之莫報焄蒿雨愴等恩渥之無

窮善積慶餘爵與夫一爰晉加於雍國尚益顯於陶親
冥格其歆熒魂如在可

游侶妻南康郡夫人蒲氏贈安定郡夫人制

勅配君子以淑女莫酬偕老之宜陟望郡以新封益厚
追榮之典誕敷顯渥增賁幽宮具官游侶妻蒲氏孕淑
名門來嬪哲彥婦專奉祭居嚴澗藻之供君但讀書雅
對春茶之煑既動循於賓敬胡莫逮於夫榮死生契濶
之難忘光寵幽冥而如在屬登爾儷載秉元樞用中錫

於愍章以旌勞於內助熒魂不昧顯號其歆可

趙與懽曾祖伯宗追贈制

勅曾矩昭垂寢衍後來之慶崇恩誕播載彰先烈之休
爰錫明綸以光幽壤具官趙與懽曾祖伯宗宗英濟美
家學傳芳籍甚才華隨所踐馭而著績渙然世味不以
仕進而為心享眉壽於八袞之餘畀雲仍以方寸之地
及今三世而益大間陪兩社以陞華沿流而遡其源載
闡前聞之積累報本而反乎始爰加峻秩之褒揚靈其

有知尚茲不昧可

趙與懽曾祖母王氏追贈制

勅夫人積行慶爰衍於曾孫邦典追封天匪私於華閥
有嘉陰德其責幽宮具官趙與懽曾祖母王氏孕淑名
門來嬪英胄性姿恭穆通大義於詩禮之間閭範肅雖
無間言於上下之際家訓發榮於三世恩徽眡數於貳
公昔渙號於小君驗鵲巢之所致今晉加於大國侈象
服之是宜祚爾後人歆予時命可

趙與懽祖師至追贈少傅制

勅美濟前聞首儒科而作古慶流後裔貶政路以昭先
爰錫明綸以華幽窆具官趙與懽祖師至性天澹泊心
地坦夷在下位而不憂藏大巧於若拙一生均佚力孝
道於終身寸地留耕付榮途於再世茲眎宰庭之秩宜
彰祖德之光命下九天尚熒魂之如在位中三少庶泉
壤之時歆可

趙與懽祖母林氏追贈制

勅念爾祖德居多內助之勤貽厥孫謀寔大前聞之美
茲眎儀於宥地宜沾澤於漏泉具官趙與懽祖母林氏
毓粹名門作嬪英胄頻繁婦職殫勞孝道之躬玉雪閨
儀刻苦義方之教慶遂綿於再世秩爰企於貳公爵眎
其夫既久正小君之位功光於昔宜進加大國之封尚
其時歆服此褒卹可

趙與懽父希言追贈制

勅垂意講師俾眎政途之秩追榮先美載加恩數之彛

爰錫明綸以華幽壤具官趙與懽父具官希言忠在社稷德尊朝廷啟歷乎木天胄監之清訏謨乎槐位樞庭之邃休譽芳邕雅志高閒有子克家孝友一門之世濟惟意承考典刑當代之家傳進之廣廈而間兩社之陞表其親庭而過三公之寵載頒慈冊申錫胙封松柏有知其對啟於休命焄蒿如在益垂裕於後昆可

趙與懽母陳氏贈制

勅尊儒勸誦祇儀兩社之臣追爵顯親推本三遷之訓

爰疏異寵以賁幽宮具官趙與懽故母陳氏冰玉閨儀
準繩婦德閔其君子猶勉以正教之義方弗納於邪生
當忠孝之門歿稱顯揚之義嘉爾有子為國近臣日相
與以談經時靡忘於加贈易畀益都之號未涯豐報之
榮尚其熒魂歆此華渚可

趙與懽妻追贈制

勅隆師經幄爰簡用於近臣視秩政塗併追榮於內助
其疏顯渥以賁幽阡具官趙與懽妻某氏淑謹有儀柔

嘉維則相而夫子所仰望以終身宜其家人乃不與之
偕老茲載加於三命悵莫作於九原錫爵從夫易饒陽
之故號陞華命服疏魏郡之新封惟爾有靈歆茲異寵
可

李性傳曾祖追贈制

勅世傳曾桀慶優積善之家詔秉洪樞寵錫進榮之典
茲惟異數其煥幽宮具官李性傳曾祖具官某望重鄉
評才遺時用隆功不伐而後必大潛德弗耀而代益昌

屬今三世之餘寄我五兵之本上以彰既往爰疏宮保之封下以垂無窮尚格熒魂之鑒可

李性傳曾祖母追贈永嘉郡夫人制

勅曾孫有慶方晉陟於本兵先烈用章併追榮於內助明綸是錫幽窆其光具官李性傳曾祖母某氏蚤奉姆儀能執婦道相而君子言無越於詩書宜其家人動不踰於矩範功垂三世學擅一家孫生子以濟時臣得君而基命爰即東嘉之壤以疏上郡之封惟其時歆嗣有

褒卹可

李性傳祖追贈制

勅簡用樞臣嘉孫謀之燕翼追榮世美昭祖考之訓彝
爰錫明綸以光幽壤具官李性傳祖某居懷忠信蔚有
典刑士不論其官而論其人泝家傳而可想位弗顯於
身而顯於後宜政任之是圖於茲再世之發揮增爾前
聞之彪炳庸侈邦儀之舊肆陞宮傳之華尚其時歆服
茲褒卹可

李性傳祖母追贈制

勅登賢宥府爰疏寵於前聞有命昕庭併追榮於內助
誕敷忱施式表流光具官李性傳祖母某氏端淑閨儀
肅雝婦道敬夫以賓禮宜室宜家教子以義方惟忠惟
孝果秀鍾於國棟茲妙幹於天樞宜膺望郡之封丕衍
漏泉之澤歆于時命惟乃之休可

李性傳父追贈制

勅樞臣簡任並追三世之榮綸寵誕頒丕顯一經之教

時惟舊典光逮幽宮具官李性傳父某夙蘊儒珍蔚為
世瑞考學殖政經之懿驗民庸朝績之間權尊信史之
家傳功在南邦之廟食春秋可信日月何傷朕不惟其
官而惟其人幸亦有是父而有是子肆登密宥宜大顯
揚爰陞宮傳之尊以侈邦休之盛歆予時命裕乃後人
可

李性傳母追贈制

勅晉用樞臣丕顯前修之善渙頒綸命併追內助之封

其表流光以彰忱施具官李性傳母某氏柔嘉維則淑
謹其身時作合於名門天祐生於英嗣敬隆賓禮有陶
親剪髻之風教尚義方得孟母斷機之旨雖榮養莫酬於
三釜然顯啟增賁於九泉茲陞宥府之華宜錫大邦之
贈尚其不昧庶或時歆可

李性傳妻追贈制

勅簡用樞臣溥錫褒崇之典載嘉閭範俾酬伉儷之思
魚軒莫賁於生前象服載加於身後具官李性傳妻某

氏毓慈華閥作合名家冰玉閨儀動弗渝於賓敬蘋蘩
婦職曾不逮於夫榮死生契闊之難忘先賁幽冥而如
在既久正小君之號茲宜加大郡之封尚其時歆服此
休寵可

李性傳妻追贈制

勅擢登樞輔載嘉內助之賢申錫綸恩俱懋追遠之德
後先如一優渥惟均具官李性傳妻某氏孕淑名家來
嬪哲彥鸞膠既續謂偕老於暮年象服是宜又溘先於

朝露屬求爾儷進秉密機爰加大郡之封增重小君之號尚其不昧庶或時歆可

杜範曾祖廷臣追封制

勅渙揚廷號晉陟衮台顯冊昭垂禮莫先於報本曾規具在恩爰重於追封疏此寵綸光於幽窆具官杜範曾祖廷臣德潛弗耀慶積有源詩書一脉之延洪勛業三傳之彪炳維忠維孝用勸相於我家自本自根茲顯揚於先烈式叶孫謀之慶爰躋公保之榮尚其時歆服此

褒卹可

杜範曾祖母追贈制

勅冊拜大臣式叶曾孫之慶國有令典並追祖妣之榮
爰錫明綸以光幽窆具官杜範曾祖母某氏儲英華閥
配德名門蘭蕙同芳期暮年之偕老蘋蘩盡職遽朝露
之溘先韋其休遺於後人副此眷求於碩輔絲綸誕播
進以望國之封松柏有知歆此殊恩之被可

杜範曾祖母追贈制

勅冊拜大臣丕渙前聞之美國有令典併追內助之榮
優渥無私後先如一具官杜範曾祖母某氏柔嘉維則
淑謹其身宜室宜家粹然懿行維忠維孝教爾聞孫屹
為社稷之臣進秉鈞衡之任報本反始既久正於小君
揚光發潛宜急陞於大國尚歆明命益裕後昆可

杜範祖永修追封制

勅念爾祖德素深積慶之源貽厥孫謀允藉秉鈞之力
其疏顯渥以賁幽宮具官杜範祖永修譽藹鄉評才遺

世用軒冕等閒之外物不在其身詩書一脉之家傳克
昌厥後有是間生之彥副予爰立之謀出丹禁之絲綸
宜陞公傳望赤城之松栢祇服愍章可

杜範祖母追贈制

勅誕揚廷號進陟鼎台論世知人仰沂前聞之美念祖
修德居多內助之功爰錫明綸以光幽室具官杜範祖
母某氏鍾賢華閥配德名門蘋蘩嚴婦職之供蘭茝藹
徽聲之馥天扶善念世挺聞孫漢相登賢已正小君之

號楚丘更畀其陞大國之封可

杜範父友宣追封制

勅渙號明庭晉登碩輔爰立作相聿新四海之瞻有聞
過庭丕顯一經之教天匪私於報德朕豈靳於追榮具
官杜範父友宣道重丘山忠存畎畝潛德弗耀遂遺明
月之珠積慶有餘上動蒼旻之鑒屬時英嗣為國蓋臣
茲誕布於制麻俾晉持於國柄報本義方之效益大顯
揚加恩公爵之封尚欽褒節可

杜範母追贈制

勅鴻鈞氣轉具瞻漢相之登鸞誥恩加載錫陶親之服
爰頒顯冊以賁幽宮具官杜範母某氏夙奉姆儀能執
婦道敬夫以賓禮宜室宜家教子以義方惟忠惟孝積
行累功之培植調元贊化之顯揚寸草春暉永感昊天
之罔極君蒿雨愴允懷濃露之重沾尚其時歆服此褒
卹可

杜範妻追贈制

勅冢宰率屬掌治式孚命相之賢夫人積行累功宜渙
加封之號徽恩誕錫懿德其光具官杜範妻某氏婉婉
聽從溫恭淑謹能勸以義閔君子之勤勞不惟其官望
名臣之事業為今日上台之地慰生平內助之功象服
是宜既久正小君之位鵲巢所致爰峻陞大國之華可
陳韡父孔碩已贈宣奉大夫可特贈光祿大夫

制

勅涓吉中辛歲儀宗祀神祇祖考已孚來格之忱内外

臣工溥洽順成之慶廼睠從臣之均佚載嘉名父以追
封爰播明綸以光幽壤具官陳讎父孔碩稟資賈絕志
節矯修師友淵源所從來者遠矣典刑氣象今罕得而
見之於中存至正大公所至有惠政嘉績宜生賢於盛
代屹為國之重臣忠孝一門輝華再世肆受釐於宣室
宜加畀於幽宮晉陞二品之聯益大一人之慶尚其不
昧庶或時歆可

陳讎母淑人田氏可特贈永嘉郡夫人制

勅維秋季月涓日中辛五室九筵丕闡明堂之祀百僚
庶尹悉均惠澤之霑旌爾前聞光於內祀具官陳韡母
田氏孕慈華閥配德英儒賓敬弗渝宜暮年之偕老義
方既效遽朝露之溘先死生契闊之難忘悽愴追思之
如在母貴以子爵眡其夫迺睠東嘉為今上郡茲厚追
封之典永孚報德之休尚其時歆服此華寵可

陳韡繼母淑人鄭氏可特贈永陽郡夫人制

勅合宮藏祀慰神祇祖考之思宣室受釐旌內外臣工

之孝母後先而如一福錫歛以惟均具官陳華繼母陳氏孕淑名門來嬪哲彥閔勞而勸以義不替珍鮭之供相敬之禮如賓何嫌膠鸞之續睽時英嗣為國從臣恩沾均佚之餘禮重追封之典瞻彼南譙之奧壤實今東楚之上游茲誕陟於褒崇示溥延於優渥尚其不昧庶幾時歆可

趙葵祖崇追封制

勅稽古彌文對時大亨奉幣陳潔俎潛孚報本之誠下

詔頒舊章庸沛漏泉之澤乃睠輔臣之忠蓋聿追祖考
之褒崇爰示贊書以光幽窞具官趙葵祖崇學窮聖奧
譽振儒英善積慶餘閥聲光之自始源深流遠子孫
勲業之相輝再傳密副於樞庭均佚暫恬於家食茲明
裡之既舉宜寵數之再加昔懋顯揚嘗領東宮之傳今
加優卹爰陞左棘之孤尚其有知歆此無數可

趙葵祖母追贈制

勅登賢宥府爰疏寵於前聞有命昕庭并追榮於內助

誕揚隆施式表流光具官趙葵祖母某氏端淑閨儀肅
雖婦道敬夫以賓禮宜室宜家教子以義方惟忠惟孝
果秀鍾於國棟茲妙幹於天樞宜膺望郡之封不衍漏
泉之澤欽予時命惟乃之休可

趙葵祖母追贈制

勅維秋季月諏旦中辛展采總章既順成於天慶受釐
宣室爰誕錫於臣工睠於近輔之賢追報重闈之德其
加異數以賁幽宮具官趙葵祖母某氏孕淑名門來嬪

英彥婉婉聽從而著德溫恭惠淑以謹身生子生孫果
相先於勲業惟忠惟孝信俱謹於朝廷矧惟副樞筦以
運籌帷亦既有爵位以畀祖妣恩徽未艾已久正於小
君禋霈誕敷宜晉加於大國尚其不昧庶或時歆可

趙葵妻追贈制

勅宗祀明堂昭格天臨之鑒予有大賚併䟽漏泉之恩
爰示睦於近臣悉追榮於內助具官趙葵妻某氏柔嘉
維則淑謹其身賓敬從容閔勤勞而勸義閨儀雖肅致

爵位而起家政期偕老於暮年奚謂溘先於朝露茲惟
大享載飾彝章撫寧郡之舊封既驗鵲巢之效渙長沙
之新渥載昭象服之宜尚其熒魂歆此褒恤可

